

朱子全书

朱子全书

御製朱子全書序

唐虞夏商周聖賢迭
作未嘗不以文字為
重文字之重莫過五
經四書每覽古今凡

傳於世者代不乏人
秦漢以下文章議論
無非因時制宜諷諫
陳事繩愆糾謬絕長
補短之計耳若觀文

辭之雄摛藻之麗古
人已有定論予何敢
言但不偏於刑名則
偏於好尚不偏於楊
墨則偏於釋道不偏

於詞章則偏於怪誕
皆不近乎王道之純
予少時頗好讀書只
以廣博華麗為事到
勇武備為用自康熙

三十五年天山告警
朕親擐甲冑統數萬
子弟深入不毛沙磧
乏水瀚海指揮如意
破敵無存未十旬而

凱旋可謂勝矣後有
所悟而自問兵可窮
乎武可黷乎秦皇漢
武英君也因必欲勝
而無令聞或至不保

者豈非好大喜功與
亂同道之故耶所以
宵旰孜孜思遠者豈
不柔近者豈不懷非
先王之法不可用非

先王之道不可為反
之身心求之經史手
不釋卷數十年來方
得宋儒之實據雖漢
之董子唐之韓子亦

得天人之理未及孔
孟之淵源至邵子而
玩弄河洛之理性命
之微衍先天後天之
數定先甲後甲之考

雖書不盡傳理亦顯
然矣周子開無極而
太極通書之類其所
授受有自来矣如星
辰繫乎天而各有其

位不能淪也光風霽
月之量又不知其何
似二程之充養有道
經天緯地之德聚百
順以事君親前儒已

誦之矣至於朱夫子
集大成而緒千百年
絕傳之學開愚蒙而
立億萬世一定之規
窮理以致其知反躬

以踐其實釋大學則
有次第由致知而平
天下自明德而止於
至善無不開發後人
而教來者也五章補

之於斷簡殘篇之中
而一旦豁然貫通之
為止雖聖人復起必
不能逾此問中庸名
篇之義則不偏不倚

無過不及之名未發
已發之中本之於時
中之中皆先賢所不
能及也論語孟則逐
篇討論皆內聖外王